

## FEDERICO GONZÁLEZ-FIERRO BOTAS, S.J.

Uviéu, 30/11/1942 - Vladivostok, Rusia, 28/06/2002

Federico González-Fierro Botas foi un sacerdote xesuíta, llicenciáu n'Historia y diplomáu en Llingües Clásiques, con doctoraos en Teoloxía, Ciencies Polítiques y Socioloxía.

Foi cura obreru nos años 60 y 70 del sieglu XX, trabayando d'emplegáu manual de fábricas, carteru y otros en Cataluña, Galicia y Europa. Nesi tiempu entró en contactu col sindicalismu y collaboró con delles organizaciones obreres, sobremanera en materia de formación sindical de la so militancia.

Viaxó en numberoses ocasiones a la Xunión Soviética onde surdió'l so interés pola cultura rusa hasta convertise n'espertu en llingua y lliteratura rusa, de la que tornó al asturianu les obres llíriques d'A.S. Pushkin.

Ente 1975 y 1984 vivió en Vigo, onde foi profesor nes Escueles Universitaries de Formación del Profesoráu d'EXB y de Graduados/es Sociales, y nun Institutu d'Enseñanza Media.

Tornó a Asturias en 1984 como Xefe d'estudios y profesor de la Fundación Revillaxixéu, de Xixón, siendo nomáu en 1988 Presidente del Colectivu Manuel Fernández de Castro, dedicáu a la recuperación de la llingua y cultura asturianas dende los valores del humanismu cristianu.

Foi Asesor de "Xusticia y Paz d'Asturies" dende 1985 hasta la so muerte en 2002 nun accidente de tráficu en Vladivostok, Rusia.





La Conceyalía d'Educación y Cultura del Conceyu de Xixón, nel so enfotu por facer alcordanza de la figura del xesuita y profesor **Don Federico González-Fierro Botas** y de la so **querencia** pola nuesa llingua y la so **normalización social**, convoca la cuarta edición del **"PREMIU FIERRO BOTAS A LA MEYOR IDEA NORMALIZADORA PAL CONCEYU DE XIXÓN"**. Trátase d'agasayar y recordar la figura de Fierro Botas al empar que la venceyamos cola moceda a la que tanto quixo y cola que se relacionó de siguío nos sos años como enseñante.

Esti premiu ta empobináu a les y los **estudiantes d'asturianu de Secundaria** de toa Asturias, col envís de favorecer el protagonismu activu del alumnáu y la so reflexón ya implicación nel procesu de normalización llingüística. Poro, han presentar un **proyectu novedosu y orixinal** que **ponga en valir l'asturianu y favoreza'l so usu y la so visibilidad nel conceyu de Xixón.**

## BASES

1. Van poder presentase a esti premiu los **centros educativos de toa Asturias** que tengan **alumnáu** matriculao n'**asturianu** en **Secundaria**. Cada centru va poder presentar un **máximu de tres proyectos**.
2. Va premiase'l **diseñu d'una campaña normalizadora** que desenvuelva una **iniciativa orixinal** col oxetivu de **favorecer l'usu y la visibilidad del asturianu en Xixón**.
3. Les propuestas que se presenten han tar desarrollaes **dafechu n'asturianu** y han ser **factibles**, polo qu'han dir **acompañaes d'un proyectu** d'un **máximu de 5 fueyes** (impreses a una cara en formatu *Times New Roman* 12) nes que tienen d'incluyise, a lo menos, los **aspectos** que vienen darréu:
  - Descripción de la idea normalizadora
  - Sector de población o persones a les que s'empobina
  - Oxetivos
  - Motivación ya incidencia social de la idea normalizadora
  - Actividá o actividaes a desendolcar
  - Temporalización y localización
4. Van poder aportase los **documentos que se consideren afayadizos** pa la comprensión y concreción del proyectu (semeyes, planos, videos, cantares, etc).
5. La **solicitú de presentación** ha ser rexistrada **electrónicamente**, pol director o directora del centru educativu, al traviés del Formulariu de Propósiu Xeneral 01.01: **Calque equí**
6. En presentando la solicitú, **los trabayos han entregase** (indicando la referencia **"IV PREMIU FIERRO BOTAS A LA MEYOR IDEA NORMALIZADORA"** amás del **conceyu** y el **nome del centru**) per dalguna d'estes tres vées:
  - **corréu postal certificáu**
  - **corréu electrónicu** (unviar a [lilinguaasturiana@xixon.es](mailto:lilinguaasturiana@xixon.es))
  - **presencialmente** na Oficina de Normalización Llingüística del Conceyu de Xixón (C/ Xovellanos nº21) de llunes a viernes de 9 a 14 h. Nesti casu, hai que pidir cita previa nel teléfonu 985 18 10 01 / 985 18 13 89 y mantener toles midíes de seguranza venceyaes al Covid.
7. El **plazu** pa la presentación de los trabayos entama'l día **30 de payares** de 2020 y remata'l día **30 d'abril** de 2021.
8. N'acabando'l plazu de presentación d'idees normalizadores, **aconceyará'l xuráu y decidirá** (por unanimidá o nel so defectu pola mayoría de votos) el trabayu premiáu.
9. El **xuráu va tar formáu** por un/a representante de la familia González-Fierro, representantes del mundu de la cultura y la educación asturianos y una representante de la Oficina de Normalización Llingüística de Xixón y va tar presidíu pol Conceyal d'Educación y Cultura del Conceyu de Xixón. El so fallu va ser irrevocable. El premiu podría quedar empu, si asina lo decidiera'l xuráu.
10. La participación nesti premiu supón **l'aceptación de tolos puntos** incluyíos nestes bases.
11. El premiu pa la idea ganadora va consistir nuna **pizarra dixital** pal aula de llingua asturiana del centru que resulte ganador, amás de la **posibilidad de la realización del proyectu** per parte de la Oficina de Normalización Llingüística de Xixón.
12. Los trabayos presentaos han ser **inéditos y orixinales** y tar escritos acordies coles **normes ortográfiques** de l'Academia de la Llingua Asturiana. De nun se cumplir estos requisitos, la propuesta nun va poder algamar el Premiu.
13. Los **trabayos non premiaos** van poder recoyese na Oficina de Normalización Llingüística nos tres meses posteriores al fallu del xuráu. En pasando esti tiempu, van destruyise.
14. El Premiu va **fallase** a lo llargo del mes de **mayu** de 2021.
15. El trabayu premiáu va pasar a ser **propiedá** de la Oficina de Normalización Llingüística de Xixón, que reserva'l derechu a utilizalu pa la so producción y esparidmientu.